

В ЧЕТВЕРГ 3-Й СЕДМИЦЫ ПО ПАСХЕ

В СРЕДУ 3-Я НЕДЕЛИ ВЕЧЕРА,

На **Г**осподи воззвах: поставим стихов 6: праздника 3, и Миней 3.

Стихиры праздника, глас 2-й:

Подобен: Егда от Древа:

Глаголы услышавша радости, от юнош приседящих гробу Слова, течение показаша тцаливейшаго устремления: и чин оставльше прежняго мироношения, яко благовестницы явишася, востание от преисподних ада благовествующе таинником, о нас Вочеловечшагося.

Утро предваривша глубокое, страхом мироносицы жены гробу предсташа, мира приносяще Жизнодавцу Христу, в мертвых вменяюще, ад умертвившаго. Но божественный ангел предста тем вопия: что Живоноснаго и Живаго с мертвыми ищите? идите востание проповедающе.

Несеша на раму херувимскую почивающаго, блаженне Иосифе, яко иное носило на раму твоею, воплощенна прежде, и ныне умерщвленна, Иже оживотвори нас умерщвленных: Егоже Воскресение зря, радуешися с честными мироносицами, аще и предрыдасте Сего умерщвление.

Слава и ныне: глас 1-й:

Приидоша на гроб Магдалина, и другая Мария ищуще Господа, и ангела видеша яко молнию сядяща на камени, и глаголюща им: что ищите живаго с мертвыми? воскресе, якоже рече: в Галилеи Его обрящете. К Нему же возопиим: воскресый из мертвых, Господи слава Тебе.

Таже, Свете тихий:

На стиховне стихира воскресна, глас 2-й:

Воскресение Твое Христе Спасе, всю просвети вселенную и призвал еси Твое создание: всесильне Господи слава Тебе.

Стих: **В Тебе возведох очи мои:**

Апостолом: **В**озвеличил еси Спасе во вселенней, верховных апостол имена: навывоша небесным неизреченным, даша суцим на земли исцеления, и сени их самыя страсти уврачеваху. Иже от рыбаей чудотворяше, и иже от иудей, богословяше благодати учения: имиже Благоутробне, даждь нам великую Твою милость.

Стих: **Помилуй нас Господи, помилуй нас:**

Мученичен: **В**елия слава, юже стяжасте святии верою: не токмо бо внегда пострадати, врага победисте, но и по смерти духи прогоняете, недужныя исцеляете, душ и телес врачеве, молитесь ко Господу, помиловатися душам нашим.

Слава, и ныне: глас 2-й:

Возлияша мира со слезами на гроб Твой жены, и исполнишася радости уста их, внегда глаголати: воскресе Господь.

Таже, **Н**ыне отпускаеши: Трисвятое. Тропар, глас 2-й-й:

Благообразный Иосиф, с Древа снем пречистое тело Твое, плащаницею чистою обвив, и вонями во гробе нове покрыв положи: но тридневен воскресл еси Господи, подай миру велию милость.

Слава: глас тойже.

Егда снизшел еси к смерти, животе безсмертный, тогда ад умертвил еси блистанием Божества. Егда же и умершия от преисподних воскресил еси, вся силы небесныя взываху: Жизнодавче Христе Боже наш, слава Тебе.

И ныне: глас тойже.

Мироносицам женам, при гробе представ ангел вопияше: мира мертвым суть прилична, Христос же истления явился чуждь. Но возопийте: воскресе Господь, подай миру велию милость.

Аще ли имать святыи тропарь, глаголем прежде тропарь: Благообразный Иосиф: Слава: святого: И ныне: Мироносицам женам: [Тропарь: Благообразный Иосиф: и тропарь воскресен: Егда снизшел еси к смерти: в вечер глаголем их прменяюще, во всю седмицу.

И отпуст.

В ЧЕТВЕРГ 3-Й СЕДМИЦЫ ПО ПАСХЕ
В ЧЕТВЕРТОК 3-Я НЕДЕЛИ ПО ПАСЦЕ, НА УТРЕНИ,

Начало обычное, якоже указася в понедельник вторья седмицы по Пасце.

На **Бог Господь**: тропарь, глас 2-й:

Благообразный Иосиф, с Древа снем пречистое тело Твое, плащаницею чистою обвив, и вонями во гробе нове покрыв положи: но тридневен воскресл еси Господи, подай миру велию милость. [Дважды].

Слава: глас тойже.

Егда снишел еси к смерти, животе безсмертный, тогда ад умертвил еси блистанием Божества. Егда же и умершия от преисподних воскресил еси, вся силы небесныя взываху: Жизнодавче Христе Боже наш, слава Тебе.

И ныне: глас тойже.

Мироносицам женам, при гробе представ ангел вопияше: мира мертвым суть прилична, Христос же истления явися чуждь. Но возопийте: воскресл Господь, подай миру велию милость.

[Аще есть тропарь святаго, глаголем тропарь прежде: Благообразный Иосиф: единожды. И тропарь: Егда снишел еси: единожды. Слава: святаго: И ныне: Мироносицам женам:]

По 1-м стихословии седален, глас 2-й:

Подобен: Препоблагословенна:

Мира погребения Твоего жены носяща, тай ко гробу приидоша уранше, иудейския боящися дерзости, и воинов предзряще утверждение: но естество немощное мужество победы, яко намерение милостивное Богу угоди. Прилично убо взываху: воскресни Господи, помози нам, и избави нас славы ради имене Твоего.

Стих: Во всю землю изыде вещание их, * и в концы вселенныя глаголы их.

Умудривый паче ритор ловцы, и пославый якоже проповедники по всей земли, неизглаголаным человеколюбием Твоим Христе Боже, теми утверди Церковь Твою, и верным низпосли благословение Твое, едине Милостиве и Человеколюбче.

Стих: Дивен Бог во святых Своих, * Бог Израилев.

Мученичен: Апостоли, мученицы и пророцы, святителие, преподобнии и праведнии, добре подвиг совершившии, и веру соблюдшии, дерзновение имуще ко Спасу, о нас Того молити спастися, молимся, душам нашим.

Слава, и ныне: Богородичен:

Божественнаго быхом общницы естества, Тобою Богородице Приснодево: Бога бо нам воплотившагося родила еси. Темже по долгу Тя вси благочестно величаем.

По 2-м стихословии, седален, глас 2:

Подобен: Вышних ища:

Мира Спасе жены приносяще, искаху тщанием помазати Тя Человеколюбче, от гроба же ангел к ним вопияше: воста Жизнодавец и Господь, поправ ад и смерть.

Слава, и ныне: тойже.

Воскресение Христово: и псалом 50. Канон праздника, со ирмосы на 8: и Миней на 4. Кондак и ексапостиларий праздника.

Песнь 1. Глас 2-й:

Ирмос: Моисейскую песнь восприимши, возопий душе: Помощник и Покровитель бысть мне во спасение, Сей мой Бог, и прославлю Его.

Распялся еси плотию, безстрастный естеством Отчим: прободен был еси в ребра, источивый миру кровь и воду: Ты Бог наш, и прославляем Тя.

Крест Твой почитаю, и погребение славлю Блаже, и пою, и поклоняюся востанию Твоему, и взываю: Ты Бог наш, и прославляем Тя.

Аще и вкусил еси желчи, сладосте церковная, но источил еси нам нетление от ребр Твоих: Ты Бог наш, и прославляем Тя.

Вменился еси Спасе с мертвыми, мертвья воздвигнувый, вкусил еси тли: ислания бо всяко не познал еси: Ты Бог наш, и прославляем Тя.

Да веселится Сион, да радуется и небо, воскресе Христос, мертвья воздвигнувый, песнословящая: Ты Бог наш, и прославляем Тя.

Плащаницами обвив Иосиф тело Твое Христе, во гробе нове положи Ты спасение: Ты же мертвья яко Бог воскресил еси.

Слава: Всесвятая Троице, едино Божество, безначальная Единице, Отче и Сыне и Божественный Душе, спасай мир: Ты Бог наш, и прославляем Тя.

И ныне: Древнюю клятву разрешивши Чистая, во утробе Твоей возрастила еси нам благословение, Младенца родивши: Сей бо Бог, аще и плоть носит.

И святого Миней на 4.

Песнь 3.

Ирмос: Неплодствовавший мой ум, плодоносен Боже покажи ми, делателю добрых насадителю благих, благоутробием Твоим.

Длани на Кресте простерл еси Иисусе, языки вся от прелести собрав, к познанию Твоему созвал еси Спасе.

Иудейстии людие Пилату вопиют: отпусти нам злодейственного разбойника, возми, возми распни Безгрешнаго.

Распеншуся Тебе Христе, помрачися свет, земля потрясется, и из гробов мертвии востаща мнози, страхом державы Твоея.

Предстоящи Кресту Агница Твоя Иисусе, плачем вопияше: камо идеши Сыне? камо грядеши Агнче, за всех заклавыйся?

Поклоняюся Твоему Кресту, воспеваю и погребение, почитаю страсти, и гвоздя руку, и копие Иисусе, и Воскресение Твое.

Воскресл еси Иисусе, пленен бысть враг, Адам избавися, и Ева с ним от уз и тли, Воскресением Твоим.

Слава: Со Отцем и Сыну и Духу Правому, единому Естеству поклоняюся и воспеваю, Лицы разделяя, и Существом соединяя.

И ныне Богородичен: Блаженна еси Чистая, из корене Иессеова сущая, из негоже жезл и цвет Христа, по плоти нас ради возрастившая.

И святаго Минея на 4.

По 3-й песни, седален и кондак святаго.

Песнь 4.

Ирмос: Еже от Девы Твое рождество пророк предзря, воспроповедаше вопия: слух Твой услышах, и убояхся, яко от юга и из горы святых приосененных пришел еси Христе.

Крестом пленил еси адово чрево, и совоздвигл еси мертвых, и смерти разрушил еси мучительство: темже иже от Адама поклоняющися, поем погребение Твое и востание Христе.

Благоволивый Спасе наш, за благоутробие милости пригвоздитися на Кресте, и от праотчия избавити ны клятвы, разреши узы многих моих согрешений: можеш бо, елика хоцеш творити.

На Кресте пригвоздивый мою древнюю клятву, и источивый мне Спасе, благословение кровию от ребр Твоих, разреши узы многих моих согрешений: можеш бо, елика хоцеш творити.

Ад Спасе, срет Тя в преисподних, огорчися помышляя, яко яже древле пожрети возможий, ныне неволею отдав, истязуется в дольних, и пленяемь и обнажаемь бывает мертвых.

Аще и камень запечатася с кустодиею, о беззаконнии врази, но воскрес Господь, якоже прорече, разрешая узы многих моих согрешений: может бо, елика хоцет, творити.

Воскресый из гроба, и пленивый ада, и ожививый мертвых, и нетление источивый мне Твоим востанием, разреши узы многих моих согрешений: можеш бо, елика хоцеш творити.

Слава: Пресущнаго Божества нераздельную славу, кто возможет изрещи? Едино бо Естеством сущи Троица поется безначальная, срасленная яко Единица, в Троице певаемая Ипостасьми простыми.

И ныне, Богородичен: Во чрево Твое всельшагося безмужно рождающая Мати Дево Чистая, непрестанно моли яко Богородица, разрешити узы многих моих согрешений: можеш бо, елика хочеш помощи.

И святаго Минея на 4.

Песнь 5.

Ирмос: Мглу души мояя Спасе мой разгнав светом заповедей Твоих озари мя, яко един Царь мира.

Ты первую одежду мою, юже ми истка, увы мне, сеятель греха, совлека еси Спасе мой, облекся в мя.

Листвие смоковное спи мне грех мой, увы мне, не сохранившему, Спасе мой, пречистую заповедь Твою, змиинным советом.

Уязвившуюся душу мою разбойническими помышленьми моими, представый иже от Марии, и елей возлияв, исцели Христос.

У Креста предстоящи Пречистая Богородица, матерски зываше: оставил Мя еси едину, о Сыне Мой и Боже!

Ты злоначального змия оружием Креста Твоего низложив, Твоим востанием, сокрушил еси жало смерти Иисусе.

Где твое, смерте, жало? где твоя, аде, победа? Адам да свопоет: сокрушился

Слава: Тебе Богу и Отцу, и Сыну, и Духу покланяюся, трем Ипостасем, и едино три верую, Существом единым.

И ныне, Богородичен: Тя безсеменным Рождеством родившую паче естества обновившаго естество, Христа единого Владыку воспеваем вернии.

И святаго Минея на 4.

Песнь 6.

Ирмос: Во глубине греховней содержимь есмь Спасе, и в пучине житейстей обуреваемь: но якоже Иону от зверя, и мене от страстей возведи, и спаси мя.

Мертв есть ад, дерзайте земнороднии, Христос бо на Древе висяй, верже оружие нань, и лежит мертв: яже бо имяше, пленися обнажився.

Пленися ад, дерзайте мертвии, и гроби отверзошася, востаните от ада, вопиет вам Христос, вся пришедый избавити от смерти и тли.

Мертвья якоже возмог пожерл еси иногда, ныне истязуемь аде, отдаждь Ми, вопиет тебе Жизнодавец и Бог, вся пришедый избавити от несытаго твоего чрева.

Жены мирносицы, что тщитесь прочее? что же живому мира приносите, воскресе Христос, якоже предрече. Да престанут ваша слезы, прешедшия на радость.

Плащаницею Тя Христе обвив Иосиф благообразный, во гробе положи: миропомазав же разоренный Твоего телесе храм, привали камень великий ко гробу.

Господь воскрес пленивый врага, и узники исторгнув, возведе вся, и первозданного Адама, того возставляя, яко Благоутробен и Человеколюбец Бог.

Слава: Троицу во Единстве воспоим вернии, с Сыном Отца славяще, и Духа единосущна Сыну, и суща во Отце собезначального и присносущнаго Бога.

И ныне, Богородичен: Во чреве неводеланно зачала еси Чистая, нетления грозд, яко лоза: из неяже безсмертия токи, якоже вино нам источают вечную жизнь.

И святого Минея на 4.

По 6-й песни кондак празднику: глас 2-й:

Радоватися мирноносицам повелел еси, плач праматере Евы утолил еси Воскресением Твоим Христе Боже, апостолом же Твоим проповедати повелел еси: Спас воскресе от гроба.

Икос:

На гроб Твой Спасе мирноносицы идущия, к себе недоумевахуся умом, и вещаху: кто нам камень отвалит гробный? И возревша видят, яко камень отвален бе, зраку же ангелову со одеянием дивляхуся: содержими же бяху трепетом, и бежати помышляху. и к ним юноша возопи: не бойтесь вы, Егоже ищите воста, приидите, видите место, идеже лежаше тело Иисусово, и скоро шедшия возвестите учеником: Спас воскресе от гроба.

Песнь 7.

Ирмос: Херувимы подражающе отроцы в пещи ликовствоваху, вопиюще: благословен еси Боже, яко истиною и судом навел еси сия вся, грех ради наших: препетый и препрославленный во вся веки.

Ты яко Человеколюбец, хотяй вся спасти от прелести, яже создал еси, претерпел еси пригвоздиться на Кресте: да погребенный образ страстьми, сей плотию Твоею обновиши Спасе, и ад низложив, воскресил еси и умершия с Собою.

На Кресте возвышаемь, вся призвал еси к Себе Щедре, якоже обещал еси Блаже: яко воистинну вся сия грехов ради наших пострадати благоволил еси. Темже и разбойнику райская врата отверзл еси Спасе.

Ты храм телесный воздвигл еси разоренный, тридневно из гроба, якоже обещал еси Блаже: да воистинну скажеши славу Твою, юже нам источаеши верою, узы разрешив, ихже держаше древле ад связанных.

О иудейское безумие! о неистовство беззаконных! Что неверное видевши, не веровасте Христу? яко немощныя, не словом ли воздвиже? Или яко весь мир Той не спасе ли, да уверяют вас поне воины, или воскресшие из мертвых.

О мертвевшии стражие ныне да глаголют, како украден бысть, Егоже не видеша неразумнии всегда? Аще бо воскресша не видеша, ни ощутиша, како украдена Сего разумети можаху когда? Да уверит вы поне камень сей, и погребальная Христова.

Что яко мертва блюдете? что печати на камени положиште еврею, страхом боящеся крадения? Се воистинну гроб запечатлесе: како убо воскресе, аще не бы Бог был Христос? Да уверяют вы воскресшии, и видени бывшии многими.

Слава: Со Отцем славим Сына, и Духа Святаго, вопиюще непрестанным гласом: Троице единственное Существо, помилуй, спаси вся, в трех Лицах Единице ущедрни ны, препрославленный Боже во веки.

И ныне, Богородичен: Во чреве Твоем Пречистая, како вместила еси Младенца, Егоже трепещут силы ангельския яко Бога? Разве якоже восхоте, якоже весть вселися, вся спасти хотяй от Адама земнородныя, разрешивый Адама клятвы оныя, снедию горькою.

И святаго Минея на 4.

Песнь 8.

Ирмос: В купине Моисею Девы чудо, на Синайстей горе, прообразившаго иногда пойте, благословите и превозносите во вся веки.

Солнечныя зари спрятахуся страхом Христовых страданий, и востаяху мертвии, и горы прекланяхуся, и колебашеся земля, и ад обнажашеся.

В пещи сущии иногда треблаженнии отроцы возвышающе руки, проображаху Блаже пречестный Крест Твой, имже низложил еси Христе вражию силу.

О иудее слепии прелестницы и преступницы, Христову Воскресению неверующии, яко ложному: что неверное видите, яко воскресе Христос, мертвыя воздвигий?

О иудее врази, аще и нам не веруете, ваша воины вы вопросите, что пострадаша они? Кто отваливый руками камень от гроба?

Кто просветивый слепцы, и прокаженныя очистивый, и хромя исправивый, и пешествовавый море немокренно яко сушу, аще не Христос Бог, мертвыя воздвигнувый?

Кто воздвигнувый мертва четверодневна из гроба, вдовича сына? кто стягнувый яко Бог разслаблена на одре, аще не Христос Бог, мертвыя воздвигнувый?

Благословим Отца, и Сына, и Святого Духа Господа.

Со Отцем Сына, и Духа Святого Святую Троицу в Божестве едином прославляем, вопиюще: Свят, Свят, Свят еси во веки.

И ныне, Богородичен: Во чреве Твоем Чистая, присноживотный хлеб, смешеный несмесно, смешением нашим, родила еси непреложно единого Христа Бога во двою существу.

И святого Минея на 4.

Поем Честнейшую:

Песнь 9.

Ирмос: Преестественно плотию заченшую во чреве, от Отца безлетно предвозсиявшее Слово, в песнях немолчных величаем вернии.

Иже на Кресте разбойника познавши Тя Бога, наследника соделал еси мысленному раю, еже помяни мя вопиюща, Всесильне Спасе.

Заушен нас ради, и оплеван был еси Иисусе от беззаконников, скрижали закона начертавый в Синаи, угоднику Моисею.

Отца и желчи Спасе, напоен был еси нас ради, давший нам тело и честную кровь, в снедь же и питие вечныя Твояе жизни.

В животворная ребра копием прободен быв Христе, пречистую Твою кровь, и честную воду источил еси миру, яко присноживотный источник.

Вменился еси в мертвых, оживлей мертвыя: во гробе положен еси, истощивый гробы: пленил еси ад, воскресив Адама.

Воскресл еси Иисусе, связан бысть враг, пленися ад, испразднишася гроби, восташи дольнии, покланяющиеся Тебе Христе.

Слава: Безначален еси Отче, несозданен еси Сыне, сопрестолен и Душе Святой, едино [Сия три] Естеством, и три Лицы, едине Боже истинный.

И ныне, Богородичен: Да веселится Иессей, да ликовствует и Давид: се бо Дева Богорасленный жезл прозябе, цвет присноживотный Христа.

И святого Минея на 4.

Катавасия: Светися, светися

Ексапостиларий мирноносцам:

Жены услышите глас радования: мучителя ада поправый, от тли мир воздвиже, тецыте, другом рцыте Моим благовестия: хощу бо создание Свое радостию озарити, отонудуже прииде печаль. [Дважды.]

Слава и ныне, тойже.

На хвалитех поставим стихи 4, и поем настояция стихиры, глас 2-й:

Ангел убо еже радуйся, прежде Твоего зачатия Господи, Благодатней

принесе: ангел же камень славнаго Твоего гроба в Твое Воскресение отвали: оубо в печали место, веселия образы возвещая: сей же в смерти место, Владыку Жизнодавца проповедуя нам, темже вопием Ти: Благодетелю всех, Господи слава Тебе. [Дважды.]

От неправедных деяний всегда боримы, и к Тебе прибегающе воистинну Сущему Богу, глас Твоих ученик приносим Ти, глаголюще: спаси ны Наставниче, погибаем. покажи и ныне врагом нашим, молимся, яко покрываеши люди, и спасаеши от бед, молитвами апостол, презря грехи, за многую благостыню Господи.

Мученичен: Всякий град и страна почитают мощи ваша, о страстотерпцы мученицы! Вы бо законно пострадавше, венец небесный приясте, и сего ради священников есте похвала, царей победа, Церквей благолепие.

Слава, и ныне: глас 2-й:

Мироносицы жены, утру глубокоу, ароматы взявша, Господня гроба достигоша, яже не надехуся обретша помышляху благоговееюще каменному отвалению, и друга ко друзей глаголаху: где суть печати гроба? где есть Пилатова кустодия, и опасное утверждение? Бысть же возвеститель не разумевающим женам, блистайся ангел, и глаголай к ним: что с рыданием ищите живаго и оживотворившаго род человеческий? Воста Христос Бог наш из мертвых яко всемогущ, подавая всем нам нетление и жизнь, просвещение и велию милость.

Таже: Слава Тебе показавшему нам свет:

И ектения: Исполним утреннюю молитву нашу:

На стиховне стихиры, глас 2.

Подобен: Егда от Древа:

Егда воскресл еси яко Бог, тогда радоватися дал еси Слове, мироносицам рек: не у вздох ко Отцу Моему, и прочее не прикасайтесь Мне, идите токмо рцыте другом Моим: се предваряет вас. Темже по сих виден был еси, и дуновением сим дал еси Спасе Духа Святаго.

Стих: Благоволил еси Господи землю Твою, * возвратил еси плен Иаковль.

Речением мироносиц жен, от мертвых проповедающим Христово Воскресение, таинницы не веровавше, потщашася гроб видети: и синдон и сударь зрится во гробе, Сам же искомый не видится. Темже Воскресение познавше, проповедницы зрятя в мире, сие и языком возвещающе.

Стих: Милость и истина сретостесь, * правда и мир облобызастся.

Явися свет неприступный нам, сияя от гроба красный Христос Господь. Ад пленися, сатана исчезе: радуются мира концы, ликует тварь, поет празднующи Церковь Христова память Иосифа всемогущаго, и мироносиц с ним жен

почитает торжество.

Слава, и ныне: глас 2-й:

Почто мира со слезами, о ученицы растворяете, камень отвалися, гроб истощися: видите тлю животом попоранную, печати свидетельствующя явственно, спящия люте стражники непокоривых, смертное спасеся плотию Божию, ад рыдает. Текша радостию рцйте апостолом: умертвивый смерть Христос, перворожден из мертвых, вас предваряет в Галилеи.

Таже, Благо есть исповедатися Господеви

Трисвятое. И по Отче наш:

Тропари праздника, глас 2-й:

Благообразный Иосиф, с Древа снем пречистое тело Твое, плащаницею чистою обвив, и вонями во гробе нове покрыв положи: но тридневен воскресл еси Господи, подай миру велию милость.

Слава: глас тойже.

Егда снишел еси к смерти, животе безсмертный, тогда ад умертвил еси блистанием Божества. Егда же и умершия от преисподних воскресил еси, вся силы небесныя взываху: Жизнодавче Христе Боже наш, слава Тебе.

И ныне: глас тойже.

Мироносицам женам, при гробе представ ангел вопияше: мира мертвым суть прилична, Христос же истления явися чуждь. Но возопийте: воскресе Господь, подай миру велию милость.

Таже ектения: Помилуй нас Боже:

Час 1. И отпуст.

В ЧЕТВЕРГ 3-Й СЕДМИЦЫ ПО ПАСХЕ **НА ЛИТУРГИИ**

Блаженна от канона праздника, песнь 7-й, на 6.

Ты яко Человеколюбец, хотяй вся спасти от прелести, яже создал еси, претерпел еси пригвоздиться на Кресте: да погребенный образ страстьми, сей плотию Твоею обновиши Спасе, и ад низложив, воскресил еси и умершия с Собою.

На Кресте возвышаемъ, вся призвал еси к Себе Щедре, якоже обещал еси Блаже: яко воистинну вся сия грехов ради наших пострадати благоволил еси. Темже и разбойнику райская врата отверзл еси Спасе.

Ты храм телесный воздвигл еси разоренный, тридневен из гроба, якоже обещал еси Блаже: да воистинну скажеши славу Твою, юже нам источаеши верою, узы разрешив, ихже держаше древле ад связанных.

О иудейское безумие! о неистовство беззаконных! Что неверное видевши, не веровасте Христу? яко немощныя, не словом ли воздвиже? Или яко весь мир Той не спасе ли, да уверяют вас поне воины, или воскресшие из мертвых.

Слава: Со Отцем славим Сына, и Духа Святого, вопиюще непрестанным гласом: Троице единственное Существо, помилуй, спаси вся, в трех Лицах Единице ущедри ны, препрославленный Боже во веки.

И ныне, Богородичен: Во чреве Твоем Пречистая, како вместила еси Младенца, Егоже трепещут силы ангельския яко Бога? Разве якоже восхоте, якоже весть вселися, вся спасти хотяй от Адама земнородныя, разрешивый Адама клятвы оныя, снедию горькою.

По входе тропарь, глас 2-й:

Благообразный Иосиф, с Древа снем пречистое тело Твое, плащаницею чистою обвив, и вонями во гробе нове покрыв положи: но тридневен воскресл еси Господи, подай миру велию милость.

И тропарь, глас 2-й:

Егда снизшел еси к смерти, животе бессмертный, тогда ад умертвил еси блистанием Божества. Егда же и умершия от преисподних воскресил еси, вся силы небесныя взываху: Жизнодавче Христе Боже наш, слава Тебе.

И тропарь, глас 2-й:

Мироносицам женам, при гробе представ ангел вопиаше: мира мертвым суть прилична, Христос же истления явился чуждь. Но возопийте: воскрес Господь, подай миру велию милость.

И храма святого: И тропарь святого, аще есть. Аще ли будет и другого святого тропарь, то рцы его: таже кондак храма. Слава: святого. Аще ли будет и другого святого кондак, такожде рцы его.

И ныне: таже кондак праздника, глас 2-й:

Радоватися мироносицам повелел еси, плач праматере Евы утолил еси Воскресением Твоим Христе Боже, апостолом же Твоим проповедати повелел еси: Спас воскресе от гроба.

Прокимен Апостола: Крепость моя и пение мое Господь, * и бысть мне во спасение.

Стих: Наказуя наказа мя Господь, смерти же не предаде мя.

Апостол Деяний, зачало 20. [Деян. 8, 26 – 39.]

Во дни оны, Ангел Господень рече к Филиппу, глаголя: востани и иди на полудне, на путь сходящий от Иерусалима в Газу: и той есть пуст. И встав пойде: и се, муж мурин, евнух силен Кандакии царицы Муринския, иже бе над всеми сокровищи ея, иже прииде поклонитися во Иерусалим: Бе же возвращаяся, и седя на колеснице своей, чтяше пророка Исаию. Рече же дух к Филиппу: приступи и прилепися колеснице сей. Притек же Филипп услыша его чтуща пророка Исаию и рече: убо разумееш ли, яже чтеши? Он же рече: како убо могу (разумети), аще не кто наставит мя? умоли же Филиппа, да возшед сядет с ним. Слово же Писания, еже чтяше, бе сие: яко овча на заколение ведеса, и яко агнец прямо стригущему его безгласен, тако не отверзает уст Своих: Во смирении Его суд Его взятся, род же Его кто исповестъ? яко вземлется от земли живот Его. Отвещав же каженик к Филиппу, рече: молю тя, о ком пророк глаголет сие? о себе ли, или о инем некоем? Отверз же Филипп уста своя и начен от Писания сего, благовести ему Иисуса. Якоже идяху путем, приидоша на некую воду, и рече каженик: се, вода: что возбраняет ми креститися? Рече же ему Филипп: аще веруеши от всего сердца твоего, мощно ти есть. Отвещав же рече: верую Сына Божия быти Иисуса Христа. И повеле стати колеснице: и снисоста оба на воду, Филипп же и каженик: и крести его. Егда же изыдоста от воды, Дух Святый нападе на каженика: ангел же Господень восхити Филиппа, и не виде его ктому каженик, идяше бо в путь свой радуясь.

Аллилуя: Услышит тя Господь в день печали, защитит тя Имя Бога Иаковля.

Стих: Господи спаси царя, и услыши ны, воньже аще день призовем Тя.

Евангелие Иоанна, зачало 22. [Ин. 6, 40 – 44.]

Рече Господь ко пришедшим к Нему иудеом: се же есть воля Пославшаго Мя, да всяк видяй Сына и веруяй в Него имать живот вечный, и воскрещу его Аз

в последний день. Роптаху убо иудее о Нем, яко рече: Аз есмь хлеб спедый с небесе. И глаголаху: не Сей ли есть Иисус сын Иосифов, Егоже мы знаем отца и Матерь, како убо глаголет Сей, яко с небесе снидох? Отвеща убо Иисус и рече им: не ропщите между собою: Никтоже может прийти ко Мне, аще не Отец пославый Мя привлечет его, и Аз воскрешу его в последний день.

Вместо же Достойно, поем:

Ирмос: Ангел вопияше Благодатней: Чистая Дево радуйся, и паки реку, радуйся: Твой Сын воскрес тридневен от гроба, и мертвыя воздвигнувый: людие веселитесь. Светися, светися, новый Иерусалиме: слава бо Господня на тебе возсия, ликуй ныне и веселися, Сионе. Ты же, Чистая, красуйся, Богородице, о востании Рождества Твоего.

Причастный: Хвалите Господа с Небес, хвалите Его в Вышних.
Аллилуиа, [трижды]